

# MY BIBLE FIRST

PRIMARY YEAR A  
Q 4 #48

## Midangte Dan Hih Nopna

### SUNDAY

**1** Philistine mite in a siangtho thukham singkuang Israel mite' omna ah a puakkik khith ciangin, Levi mipa' inn ah kum sawmnih sung kikoih hi. Tua hun sungteng Philistine mite in Israel te uk uh hi.

Eli a sih khith ciangin, Samuel in a gam sunga mun le khua tampite ah mite va pha kawikawi hi. Mite in amau buainate pen Pasian muangin a thu man ding a kamciamte uh a tangtunsak loh man hi, ci-in a hihtheih tawpin gen kawikawi hi. **1 Samuel 7:3.**

A tawpna-ah Samuel' gen thute a dik lam mite'n thei uh hi. Amaute in bang hih uh hiam? **Aneu 4.**

Samuel pen bangzah-in lungnuam in lungdam ding hiam! Tu in kikhoppi ding khat geel hi. Tua pen koi mun hi a, amaute'n bang hih uh hiam? **Aneu 5, 6.**


Pasian' mite in amau lipkhap-huai gamtatna tawh Pasian a natsakna, a galte in Pasian a zahpihsak khaknate hangin kisikkik in mawh pulak uh hi. Tu-in amaute in Ama tungah cihtak ding hong teelkik uh hi.

Kikhop nading mun pen Philistine te tawh a kido sunga Eli tapate in thukham singkuang a vapuakna galphual tawh kinai hi. Eli tate tua lai mun ah si in, galte in thukham singkuang matsak uh hi. Tu-in Philistine te in, Israel mite in hong dokik ding uh hi, ci-in ngaihsun uh hi. Bang thu piang hiam? **Aneu 7.**

Tu in Israel mite in Pasian a muang suak uh diam? Zingciang hih thu i mu khia ding hi.



**NGAIHSUN-IN:** Israel mite in Pasian a bawldan-un mi khat in nang tungah hong bawl hileh, tua mipa mawhna na maisak nuam ding hiam? I kisik takpi ciangin Pasian in hong maisak pen na nuam hiam?



### KAMNGAH

Na hihna khempeuh ah amah phawk in; tua hileh lampi maan hong lak ding hi. **Paunak 3:6**

**In all your ways acknowledge Him, and He shall direct your paths. Proverbs 3:6**

### MONDAY

**2** Israel mite in Samuel tawh kikhopna a neihna uh pen tu-ma kum 20 lai-a Philistines mite in galzo a, a siangtho thukham singkuang a laksakna mun ahi hi. Tu-in Israel mite in amau a dokik dingin Philistine mite hong kuan uh, cih thei uh hi.

Nidangin Israel mite ahih leh a galte lau-in taimang uh hi, ahihkeh Pasian kiangah huhna ngen loin gal va do gawp thei zel uh hi.

Ahi zongin tu in, mite in a milimte koihkhia in, leh amaute in amaan Pasian bek hong bia uh hi. Amaute in nibup in antang in, a mawhna pulak uh hi. Philistine te galdo dinga hong pai uh ciangin, amaute in Pasian kep nading Samuel thu ngensak uh hi. **1 Samuel 7:6-8.**


Samuel in Pasian tungah biakna pia in amah in thungen a, Pasian a thungetna dawng hi. **Aneu 9.**

Thakhat thu in, Samuel biakpiakna i laizang ah, a ngaih mahmah vanging hong om hi. Meivomte koi pan hong pai cih ki theilo hi. Munciteng ah khuaphia in, Philistine omna ah a dipkuat huai huihpi guahpi in buaksuk hi. A sawt loin Philistine galkapte leilak

munci-teng misi luang vive om uh hi. Tua a lauthawng a, a taii Philistine galkapte nungah Israel galkapte'n nungdelh uh hi. **Aneu 10, 11.**

A kamciam om mah bangin Pasian in a mite huh hi. Samuel in Pasian tungah lungdamkoh ding mangngilh lo hi. **Aneu 12.**

Mite khempeuh amau inn ciat ah ciah uh a, amaute lungsim ah suakta in lungdam uh hi. **Aneu 13, 14.**

 **NGAIHSUN-IN:** *Samuel in suangtum zangin ciamteh a, Pasian in ama kamciamte kemcing hi ci-in mi khempeuh gen hi. Nang leh na innkuan ading Pasian hong sepsak thute lai in at khiat ding na ngaihsun ngei hiam? Tua in aboih mahmah sepkhiahihi.*

## TUESDAY

**3** Samuel pen makai hoih hi. Na khempeuh a lem theih nadingin kum simin amah in bang hih hiam? **1 Samuel 7:15-17.**


Samuel in Eli tawh sawtpi omkhawm ahih manin, naupangte in thu man ding a thupitzia tel in na um hiam? Mun khat pepeuh a pai ciangin amah in nule-pate kiangah, a tate uh Pasian' Thupiak Sawmte a hilh dingin hantawn hi. Tua ban-ah amaute in Pasian muangin a thu manh ding a teel ciangun Pasian in a bawlsa a lamdang thupiangte a gen ding uh ahi hi.



Samuel in kam-sangte' sangte ci-in sang nih pankhia hi. Tua sangte ah, khangnote in Israel mite minampi a suah theih nanging Pasian' piak thukhunte kisin-sak hi. Amaute in a tuamin koi banga Pasian nasemte suak thei ding cihte sin uh hi. Sangnaupang khempeuh in amau

mahmah leh amau innkuanpihte a kepsiam nadingun nasep nam tuamtumte koici sep ding cihte sin uh hi.

Samuel in a tapate hoihtak-in pantah hi. Ahih hangin khat ngekbawl thei ahih manin thu manglo zel uh hi. Amah a teek ciangin, amah in Israel makaite kiangah ka tate in hong huh thei ding hiam, ci-in donga, amau in zong thukim pah hi. **1 Samuel 8:1, 2.**

 **NGAIHSUN-IN:** *Naupang pawlkhatte inn ah sangkah in, adangte pawlsang-ah kah uh hi. Kumpi sangah naupangte Pasian thu a kihilh hiam? Banghang? Naupang a tam zaw in a gol uh ciang in bang ut uh cih ngaisun uh hi. Tua zong, a lungsim uh khel den*

*uh hi. I gol ciang in, nu-le-pate in ei ading aboih leh anuam nasep ding hong hihl ding uh hi.*

## WEDNESDAY

**4** Samuel in a tate a thumang ding leh a migi dingin limtak hihl hi. Ahi zongin, amaute in Samuel a huh uh ciangin, Satan in asia gamta dingin ze-et hi. Tua ze-etna amaute in a ngai uh hiam? **1 Samuel 8:3.**

Golhguk-ne cih ciangin a maanlo thugen nadingin sum ngah cih ahi hi. Kuamah in golhguk a ne peuh-mah muang lo uh hi.

Samuel in a tate tua banga a gamtat lam na thei kha lo hi. Thei hileh, amau nasep panin khawlsak pah ding hi. Tua thu a zak ciangin amah dah mahmah a, ahi zongin, Israel upate dei-ngetna a zak ciangin dah zawsem lai hi. **Aneu 4, 5.**


Samuel in citak tak-in Pasian geelna zuhi ding hong hanciam hi. Pasian in a mite in galte kiang panin hoihtak dal a, kum tampi sung daitak-in nungtasak hi. Amaute a lungdam thei uh hiam?

A heh ding sangin, Samuel in bang hih hiam? Amaute' kumpi dei-hna ahang taktak pen Pasian in banghang hi, ci hiam? **Aneu 6, 7.**

Amaute a kim-a minam dangte bangin ut uh hi. Samuel in kumpi nei leucin bangci ding cihte hihl hi. A tawpna ah, amaute'n dei-h nawn lo ding uh hi. A kumpi uh a hoih phial zongin, a leitang hoihpente, a ganhingte, leh siah tampi a piak uh kul ding hi. Tua ban-ah, a tapate uh galkap ding leh a tanute uh kumpi nasem dingin pia kha ding uh hi.

Ahi zongin, amau lungsimpuak kikheel lo hi. Tua manin, Samuel in Pasian hopihkik hi. **Aneu 19-22.**

Pasian in Israel mite'n kumpi dinga a dei-h a migi khat teel hi. Amah Israel minamte sungah a melhoih leh a thasangpen ahi hi. Ama min pen Saul hi. A pa min in Kish hi-a, amah Benjamin suan pan ahi hi. **1 Samuel 9:2.**

 **NGAIHSUN-IN:** *Na kisap loh pi khat dei-h veve in nakpi takin na ngen-gei hiam? "Midangte in zong nei hiven" ci kha ding hiteh, tua in a boih ahi hiam?*

## THURSDAY

**5** Nikhat, Saul' pa, Kish in a nasemte khat na a sawl hi. Banghang hiam? **1 Samuel 9:3, 4.**

Lano a muh theih loh uh ciangin amaute in ciahkik ding sawm uh hi. Banghang hiam? **Aneu 5.**





Samuel pen amau tawh kinai khua ah hawh cih a za uh hi. Samuel kamsang ahih manin, amah in a lano muhpih thei kha ding hi. Khuapi sungah amaute in an ne dinga pai Samuel mu uh hi. A zanni-in Pasion in Saul tawh Samuel a kimuh ding na genkhol hi. Samuel in a melhoih, a thasaang Saul hong muh ciangin, Pasion in bang gen hiam? **Aneu 17.**


Saul in Samuel mu ngeilo hi. A kimuh uh ciangin bang thu piang hiam? **Aneu 18-20.**

Saul in Samuel gen nop thei hi. Amah in Israel-te kumpi ding hi, cih gen hi. Amah in Samuel tungah bang gen hiam? **Aneu 21.**

An a nek khith uh ciangin, Samuel in Saul tawh kiho nuam ahih manin a nasempa a mapai dingin a sawl hi. **1 Samuel 9:27; 10:1.**

Saul kumpi ding a hihna ah, Samuel in haza lo hilo hiam? Ahi zongin amah in it-in kumpi hoih a suah ding deih hi.

Saul inn a tun ciangin, Samuel in Israel kumpi dinga sathau a nilh lam kuamah gen nuamlo hi. A pano in a thupiang teng a theih nop luat ciangin Saul in bangci dawn hiam? **1 Samuel 10:14-16.**

 **NGAIHSUN-IN:** *Bang in a piang ngeina hiam, ang-sung khualna maw, ang-sung khual lohna? Samuel a koi pen hiam?*

## FRIDAY

**6** Israel mite in kumpi nei ngeilo uh hi, tua in amaute pen leitunga namdangte tawh a kilamdanna ahi hi. A vang-lian eite Pasion in amau kumpi hi a, Israel te in Pasion um in, a thu zui peuh le uh, kuamah in amaute susia theilo cih namdangte'n thei uh hi.

Namdang khempeuh in gal a do ding ciangun a kumpite un makaih uh hi. Tu in Israel te zong tua bang ut uh hi. Amaute in kumpi deih uh hi. Nak dah huai!


Kumpi neih ding pen Pasion geelna hilo hi. Mite in Pasion tung sangin a kumpite tungah kinga zaw ding cih Pasion in thei hi. A kumpi uh Pasion tungah a kingak kei leh, Amah in a deih bangin thupha pia/huh theilo ding hi.


Ahih hangin, Pasion in a geelna zui dingin kuamah hahsawl gawp lo hi. Amah in kumpi nei sak hi. Amau deih dan tawh kituak kumpi zong teelsak lai hi. A kumpi uh thasaang in melhoih ding hi.




Saul tawh Israel mite a kimuh ding hun hong tun ciangin, Samuel in mite kai-khawm hi. Beh khatciat panin mi tampite hong pai uh hi. Samuel in amaute tung bang gen hiam? **1 Samuel 10:17-19.**

Pasion in amaute ading kumpi a teelsakna Samuel in mite theisak nuam hi. Beh namkhat khith namkhat a kipulak ciangin, Pasion in Benjamin beh hong teel hi. Benjamin suan panin Kish hong teel hi. Kish i tate sung panin Saul hong teel hi. Ahih leh amah koi ah om ahi hiam? Kuamah in mu zolo uh hi. Pasion in ama omna a thei hiam? **Aneu 22-24.**

 **NGAIHSUN-IN:** *Kumpi hoih adingin thasaan'na le melhoihna bek kisam hiam? Saul pen ki-niamkhiat mahmah hi. Ki-niamkhiat in thumang paisuak hileh Pasion in thupha a pia thei ding hiam? Pia thei ding hi. Mite in ki-niamkhiat ding a teel ciangun Pasion in thupha a pia thei lai hiam?*



© sweetpublishing.com; License—<http://creativecommons.org/licenses/by-sa/3.0/>



© sweetpublishing.com; License—<http://creativecommons.org/licenses/by-sa/3.0/>

**FURTHER STUDY:** 1 Samuel 8–10; *Patriarchs and Prophets*, pp. 589–612; *The Bible Story*, vol. 3, pp. 160–169.



## THE STORY CORNER

# Harriet a Kisittelna

Adapted by Amy Sherrard

**H**arriet leh a nu vanleina ah pai uh hi. Lampi a kantan ciangin, Harriet pen a nu nungah kal khat, kal nih a zekai zaw in pai hi; amah in a nuai a et suk leh, lam kiu ah sumbawm om hong mu hi. Harriet in tua sumbawm a top ciangin kuamah in mu lo ahih manin amah'n a ip sungah guang saissai hi.

"A mute' kep" ci-a, Harriet in hong ngaihsun hi. "Sumbawm sungah sum om dingin ummawh ing."

"Na muh lam na nu kiangah gen in," ci-in aw-ging khat in a lungsim ah gen hi. Ahih hangin Harriet in "Hilo, Kei a hi, ka gen kul kei," ci-in dawngkik hi.

Inn a tun ciangin Harriet a inndeit sungah lut in, a sumbawm sung en hi. A sumte a sim ciangin lawp mahmah hi. Tua sungah sum sawm lai a kikhep dal sawm om hi. Sum tuazah nei dingin ki um theilo hi.

Aw neu khat in, "Nang a' hilo hi. A neite min tua sungah a om hiam, cih en in," ci hi.

Harriet in en nuam lopi mahin hong en hi. A upmawh mah bangin, a neite min leh inn mun na om hi.

Ahi zongin Harriet in, "Ken piakik nuam keng," ci hi. Tua sum sawmlaite a et kawm in, "A neipa in, a mu kua cih theilo hi. Hih sum teng tawh bang vanteng ka lei thei tam maw," ci-in Harriet in a lungsim hong ngaihsun hi.

Ahih hangin tua aw neu in gen-gen lai hi. "Nang lungnuam lo ding hiteh. Tu in zong nuam taktak kei teh," ci hi. Harriet in tua aw neu pen a ngaihsutna ahih lam thei-in, maan ahih manin nuamsa lo pah hi.

Aw neu in, "Na nu kiangah gen in. Na nu na pate in na lawmhohipen ahih lam thei hiteh," ci hi.

Harriet huisa kawmin, Sabbath School a Lai Siangtho mun hong phawk hi: "Na gu kei ding hi." Amah in guta a hihna hong kiphawk hi. Tua bang ngaihsutna in Harriet a sumbawm siinkik-in, inn nuai-ah a nu nitak an a huan laitak-in paisuksak hi.

A thupiang teng Harriet in a gen sungin, a nu in a thugen hoihtak ngaihsak hi. Amah in a ngaihsut-teng zong hong gen hi. A nu in, a tanu hong kawi hi. "Bang hih lecin hoih ding hiam?" ci-in hong dong hi.

Harriet in a dawn nading thei hi. "A neipa min Mr. Jefferies hi a, ka pa kiangah, a inn mun ah hong khak nadingin ngen in a neipa ka piakik ding hi," ci-in a nu kiangah hong gen hi.

A nu pen lungdam mahmah hi; A pa zong tua inn mun-ah a paipih ding pen lawpin, nuam mahmah hi; Mr. Jefferies zong a sumbawm ngah-kik ahih manin nuam mahmah hi. Amah in Harriet lungdam ko hi; amah a ciah ma in, sum pek sawmlai la khia in, "Na migitna leh na

cihtaknate hoihsa ing, tua ahih manin hih na kem in" a cih kawmin a saan pelmawh ding sum Mr. Jefferies in a pia hi.

Harriet in zong lungdam ko hi; tua ciangin a pa tawh hong ciah uh a, a nuam mahmah lam hong phawk pan pan hi. Amah zum nawnlo hi, banghang hiam cihleh amah in tua aw neu pen manga, a maan a a gamtat man ahi hi. A dang kua zong lungdam dingin na um hiam?



**Additional resources:** nature lessons, activities, music, Bible lessons, Scripture memory, and more.

**My Bible First** Copyright © 2015

**Phone:** 1-877-242-5317

**Web:** [www.mybiblefirst.org](http://www.mybiblefirst.org) • **E-mail:** [sales@mybiblefirst.org](mailto:sales@mybiblefirst.org)

*Unless otherwise noted, Scripture quotations are from the NKJV.*